



Inatsisartut

Aningaasaqarnermut Ataatsimiititaliaq

Finansudvalget

Ulloq/Dato:

17. januar 2011

J.nr.:

01.31.06/11-00518

Naalakkersuisutmedlemmet for Finanser

Aningaasaqarnermut Ataatsimiititaliap suliaq nr. 01.31.06/11-00518 pillugu arfininngornermi ulloq 15. januar 2011 aalajangiineranik Naalakkersuisunut ilisimatitsineq.

Arctic Green Food A/S aamma Royal Greenland A/S 2011-mi sullissinissamik isumaqatigiissuteqarfigineqarnissaat.

Naalakkersuisut **inassutigaaat,**

- Aningaasaqarnermut Ataatsimiititaliap Arctic Green Food A/S-imut sullissinissamik isumaqatigiissut ilanngunneqartoq, 11.400.000 kr.-inik naleqartoq taamatut imaqartillugu akuerissagaa,
- Aningaasaqarnermut Ataatsimiititaliap Royal Greenland A/S-imut sullissinissamik isumaqatigiissut ilanngunneqartoq, 11.000.000 kr.-inik naleqartoq taamatut imaqartillugu akuerissagaa,
- Aningaasaliissutit konto pingaarnermi 50.01.18, Ingerlatsinermit isumaqatigiissutit, tunisassiorfinnit, 11.400.000 kr.-inik ikilisinneqassasut,
- Aningaasaliissutit konto pingaarnermi 50.01.18, Ingerlatsinermit isumaqatigiissutit, tunisassiorfinnit, 11.000.000 kr.-inik ikilisinneqassasut kiisalu
- Aningaasaqarnermut Ataatsimiititaliap akuerissagaa konto pingaarnermi 50.01.18, Ingerlatsinermit isumaqatigiissutit, tunisassiorfinnit, aningaasaliissutit sinneruttut tapiissutit aamma inuusutissarsiortunut tunngasunik ikiorsiisarnikkut aningaasalersuinernut misissueqqissaarnissamut atorneqassasut, tassunga ilanngullugit suliffeqarfinnut ukiut siuliiniit kontomit matumanga tunisinernut sullissinermut isumaqatigiissuteqarfigineqartarsimasut naatsorsuutaannik misissueqqissaarnissanut atorneqassasut.

Aningaasaqarnermut Ataatsimiititaliap oqaaseqaatai

Apeqqtunut itisiliissutaasunut 15-inut Naalakkersuisut akissuteqarnissaasa utaqqineqarnissaa siunertaralugu suliami matumani isummernissani kinguartinneqassasoq Aningaasaqarnermut Ataatsimiititaliap ulloq 7. januar 2011-mi aalajangiuppaa. Tamatuma kingorna Naalakkersuisut akissutaat ataatsimiititaliamit tiguneqarlutillu oqaluuserineqarput.

Ataatsimut isigalugu ataatsimiititaliaq isumaqarpoq sullissinissamut isumaqatigiissummi allanngortinneqartussatut ataatsimiititaliap piumasqaatai Naalakkersuisut akissummini malikkaat, taamaattumillu taanna maanna iluserilikkamisut iluseqartoq ataatsimiititaliamit akuerineqarsinnaalluni.

Inuussutissarsiutinut tapiissutinik taamaattunik appartitsiartuaarnissamut pilersaarummik suliaqartoqartariaqartoq ataatsimiititaliaq suli isumaqarpoq. AGF 2013-ip kingorna pisortanit tapiissutitaqanngitsumik ingerlanneqalissasoq naatsorsuutigineqartoq sullissinissamik isumaqatigiissummi allassimasoq iluarisimaarlugu ataatsimiititaliap paasivaa. Tamanna kontomi pingaarnermi 50.01.18-imi, Tunisassiorfinnut ingerlatsinermut tapiissutinut tunngasumi, aningaasaliissutit ukiut qaninnerit ingerlaneranni ingerlaavartumik millisikkiartorneqarnerisigut ersersinneqassasoq ataatsimiititaliamit naatsorsuutigineqarpoq.

Kontomi pingaarnermi taaneqartumi aningaasaliissutinut tunngavigineqartut 2012-mi aningaasanut inatsimmi erseqqissarneqartariaqartut ataatsimiititaliaq isumaqarpoq. Taamaallunilu illoqarfiit nunaqarfillu sorliit tunisassiorfinnut tapiissutinik pissarsisinnaatitaasut erseqqissarneqartariaqarpoq. Tamanna Naalakkersuisunit qulakkeerneqassasoq ataatsimiititaliamit naatsorsuutigineqarpoq.

Matuma kingorna suliamut isummernermini ataatsimiititaliaq marlunnet avippoq.

Aningaasaqarnermut Ataatsimiititaliami amerlanerussuteqartut, Naaja Nathanielsenip, Per Berthelsenip, Aqqaluaq B. Egedep aamma Akitsinnguaq Olsenip Naalakkersuisut inassuteqaataat akuersissutigaat. Tamatumani **tunngavissaatinneqarluni** suliffeqarfimmut pisortat tapiissutai naapertuuttumik peqqussutillu malillugit atorneqarnerannik naliliinissaq siunertarlugu kukkunerisuiusumik akuerisaasumik Namminersorlutik Oqartussat kisimik toqqagaannit aningaasarsiaqartitaannillu Arctic Green Foodip naatsorsuutaasa nalunaarutaasalu misissorneqarnissaat. Kukkunerisuiusup taama misissuinerani apeqqummut 5-imut 6-imullu Naalakkersuisut 12. januar 2011-mi akissutaanni pissutsit ilaatinneqartut ilanngunneqarluarsinnaapput. Aningaasaqarnermut Ataatsimiititaliap apeqqutaanut nr. 12-imut akissummi taamatut periuseqarnissamut akuersaarnertik Naalakkersuisut oqaatigigaat amerlanerussuteqartut iluarisimaarlugu maluginiarpaat.

Aningaasaqarnermut Ataatsimiititaliami ikinnerussuteqartup, Niels Thomsenip inassuteqaatit Arctic Green Foodimut tunngasut akuerisinnaanngilai. Arctic Green Foodimut tapiissutit tamarmiusut ilaat annertoq Maniitsumi tunitsiviup ingerlanneqarneranut atorneqarnissaa ataatsimiititaliami ikinnerussuteqartup naapertuutinnngilluinnartutut isigaa, tassa kontomi pingaarnermi 50.01.18-imi, Tunisassiorfinnut ingerlatsinermut tapiissutinut tunngasumi, aningaasaliissutinut tunngavigineqartuni allassimammatt suliffissaqartitsinissap qulakkeerneqarnissaa siunertarlugu tapiissutit nunaqarfinnut aalajangersimasunut illoqarfinnullu mikinernut atugassiissutaasut, tamatumani Maniitsoq ilaatinneqartoq pisariaqarneratut erseqqitsigisumik oqaatigineqarsinnaanngilaq. Ingerlatseqatigiiffiup tunisassiornerata ingerlaannassappat sullissinissaq pillugu Arctic Green Foodimut isumaqatigiisutip ilarujussuata Maniitsumi tunisassiorfimmatt atorneqarnissaa pisariaqartutut isigineqartoq Naalakkersuisut akissutaanni allassimavoq, tassa ingerlatseqatigiiffiup tunisassiorfiisa akornanni tunisassiorneq agguataagaammat. Tunisassiorfimmulli tapiissuteqarnissaq ukiut siuliini pisariaqarsimanngilaq erseqqinngilarlu sooq massakut tamanna pisariaqaleriataarnersoq. AGF ukiualunnguit ingerlaneranni pitsaasumik ingerlalissasoq Naalakkersuisut piffinni arlalinni allapput – tamannali kisitsisitigut missingersuutitigullu saqqummiunneqartuni naammattumik annertussusilimmik ilimanarsisinneqanngilaq. Ataatsimut isigalugu ataatsimiititaliami ikinnerussuteqartoq isumaqarpoq Arctic Green Foodimut tunngatillugu pisortat aningaasaliissutinik atuinerannit pissarsiasat pisariaqarneratut paasinarsisinneqanngitsut, taamaattumillu inassuteqaatit

suliffeqarfimmut tassunga tunngasut ikinnerussuteqartumit taperserreqarsinnaanngillat. Suliffeqarfiulli kukkunersuiusumit misissorneqarnissaanik amerlanerussuteqartut piumasaat ikinnerussuteqartumit tamakkiisumik taperserreqarpoq.

Amerlanerussuteqartut naliliinerat naapertorlugu aalajangiisoqarpoq.

Aningaasaqarnermut Ataatsimiititaliap aalajangiinera

Aningaasaqarnermut Ataatsimiititaliami ikinnerussuteqartup inassuteqaatit Arctic Green Foodimut tunngasut akuersissutigisinnaanngilai.

Siuliani allassimasut naapertorlugit suliffeqarfimmut pisortat tapiissutaasa atorneqarnerannik naliliinissaq siunertaralugu Arctic Green Foodip naatsorsuutaasa nalunaarutaasalu kukkunersuiusumik Namminersorlutik Oqartussanit toqqarneqartumik aningaasarsiaqartinneqartumillu misissorneqarnissaat **tungavissaatillugu** Naalakkersuisut inassuteqaataat Aningaasaqarnermut Ataatsimiititaliami amerlanerussuteqartunit **akuersissutigineqarput.**

Aningaasaqarnermut Ataatsimiititaliap sinnerlugu

Naaja Nathanielsen
Aningaasaqarnermut Ataatsimiititaliap siulittaasua